

Evening Dogri (NSD) Bulletin 21-08-2025

आकाशवाणी

खबरां ----

1. संसद अनमित्थे समें लेई स्थगित।
2. केंद्री संसदी मामलें दे मंत्री किरेंण रिजिजू होरें आखेआ ऐ जे संसद दा बरसांती आहला इजलास मुल्खै ते सरकार लेई बड़ा कारी दा सिद्ध होआ ऐ।
3. संसद नै ऑनलाइन गेमिंग दे बाद्दे विस्तार ते विनियमन आहले बिल-2025 गी पास करी दित्ता ऐ।
4. रेलवे देयाली ते छठ उत्सवें लेई 12 ज्हार वशेश रेल गड्डियां चलाग ते 4 नमियां अमृत भारत सेवां शुरू करोग।
5. प्रधानमंत्री नरेंद्र मोदी होरें आखेआ जे भारती जनता पार्टी दे विकास एजेडे करी पच्छिम बंगाल, आस भरोचिएं नजरीं कन्नै भारती जनता पार्टी आहले पाससै दिक्खा'रदा ऐ।
6. विदेश मंत्री डॉ. एस. जयशंकर होरें पूरा भरोसा दस्सेआ जे भारत-रूस दक्खया सरबंध उच्चतम शिखर पर पुज्जडन।

<><><><><><>

Parl. Sine Die

लोकसभा ते राज्यसभा दी कार्यवाही अज्ज अनमित्थे समें लेई स्थगित करी दित्ता गेआ। संसद दा एह बरसांती आहला इजलास जंदे म्हीने दी 21 तरीक गी शुरू होआ हा। अज्ज दपैहरी पैहली बारी स्थगित होने दे बाद जिसलै लोकसभा दी बैठक फी लग्गी तां स्पीकर ओम बिरला होरें दस्सेआ जे

इजलास दरान 14 सरकारी बिल पेश कीते गे हे ते कुल 12 बिलें गी पास कीता गेआ। उनें दस्सेआ जे इस इजलास दरान आपरेशन सिंदूर पर द'ऊं दिनें दी विशेष चर्चा बी करवाई गई जेड़ी प्रधानमंत्री नरेंद्र मोदी हुं'दे परते कन्नै सम्पन्न होई। स्पीकर होरें इब्बी जानकारी दित्ती जे लोकसभा च भारत दे अंतरिक्ष प्रोग्राम दी उपलब्धिएं बारै बी इक्क विशेष चर्चा कीती गई। श्री बिरला होरें सदन दे कम्मै-काजै च बार-बार पेदे विघ्न करी होए दे कीमती समें दे नुकसान पर नाखुशी बी प्रगट कीती।

<><><><><><>

Rijju-Parl.

केंद्री पार्लियामानी मामलें दे मंत्री किरिण रिरिजू होरें आखेआ ऐ जे संसद दा बरसांती आहला इजलास मुल्लखै लेई ते सरकार लेई बड़ा कारी दा साबित होआ ऐ। इजलास दे स्थगन होने पर अज्ज संसद च मीडिया आहलें कनै गल्ल करदे होई श्री रिजिजू होरें आखेआ जे केइए नमें सांसदें गी संसद च बोलने दा मौका नेई थहोई सकेया ते एहदे लेई विपक्ष आपूं जिम्मेवार ऐ। विपक्ष दी नुक्ताचीनी करदे होई उनें आखेआ जे उनें सदन दी कार्यवाही च विघ्न पाया ते तय कीते गेदे समें मूजब चर्चा च हिस्सा नेई लेया। मंत्री होरें नाखुशी जाहर करदे होई आखेआ जे विपक्ष नै सांसदें गी ग्रुप कैप्टन शुभांशु शुक्ला होरें गी बी बधाई देने दा मौका नेई दित्ता जेडे अंतरराष्ट्रीय अंतरिक्ष स्टेशन पर जाने आहले पैहले भारती ना।

<><><><><><>

Online-Gaming bill

संसद नै ऑनलाईन गेमिंग ते विनियम बिल-2025 गी पास करी दिता ऐ। लोकसभा ते राज्यसभा, दौनें इसी मंजूरी देई दित्ती ऐ ते एह बिल हून कनून बनी जाग। एह बिल ई-स्पोर्ट्स ते ऑनलाईन सामाजिक खेडुं गी बढ़ावा दिन्दा ऐ ते हानिकारण ऑनलाईन धन-सरबंधी गेमिंग सेवाएं उप्पर रोक लांदा ऐ। एहदे च ऑनलाईन गेमिंग प्राधिकरण नियुक्त करने दा प्रावधान ऐ, जेड़ा क्षेत्र दे नियामक पर्यवेक्षण, नीतिगत सहयोग, रणनीतिक विकास ते विनियमों दी दिक्ख-रिक्ख करोग। एह बिल लोकें

खास करियै, युवाएं गी इयै जनेही खेडुं दे माड़े असर थमां बचाने आस्तै बनाया गया ऐ। पैसे सरबंधी ऑनलाइन गेमिंग कन्नै जुड़े दे कनून दी खलाफवर्जी करने पर त्र'ऊं ब'रें तगर दी जेल ते 1 करोड़ रपे जुर्माना जां फी इनें दौनें दा गै प्रावधान रक्खेआ गेदा ऐ।

<><><><><><>

Online Gaming

कल लोकसभा च आनलाइन गेमिंग दे बाद्दे विकास ते विनियम विधेयक 2025 दे पास होने पर डॉ. बी.आर अम्बेडकर राश्ट्री तकनीकी संस्थान जालंधर पंजाब दे शोध ते सलाह विभाग दे डीन डॉ. रोहित मेहरा होरें सरकार दी इस कोशिश दी सराहना कीती ते आखेआ जे एहदे नै आनलाइन गेमिंग गी बवस्था आहले ढंगै सिर कीता जाई सकोग ते पैसे दे माड़े इस्तेमाल गी रोकने च मदाद थ्होग।

<><><><><><>

Online Gaming

मुख्य भरै आहला लेखा जम्मू-कश्मीर दे बसनीकें दी ऑनलाइन गेमिंग बिल-2025 गी संसद दी मंजूरी थ्होने दा स्वागत करदे होई इसी इक्क प्रगत्तिशील गैंड करार दित्ता ऐ जेड़ी युवाएं दी उर्जा गी रचनात्मक कम्में च लाने च मदाद करोग। मकामी लोकें बिश्वास जताया ऐ जे एह बिल बड़ी तेजिया कन्नै बधा करदे ऑनलाइन गेमिंग सेक्टर च पारदर्शिता, जवाबदेही ते सुरक्षा यकीनी बनाने दे कन्नो-कन्नो युवाएं लेई नमें मौके बी पैदा करोग। विद्यार्थिं दे माता-पिता ते शिक्षकें बी इस्सै चाल्ली दे बिचार सांझे करदे होई आखेआ ऐ जे इस नमीं बवस्था कन्नै युवाएं अंदर ऑनलाइन गेमिंग दी लत ते एहदे माड़े इस्तेमाल गी रोकने च मदाद मिलोग।

<><><><><><>

Spl. Trains

रेल मंत्री अश्विनी वैष्णव होरें ऐलान कीता ऐ जे देआली ते छठ दे ध्यार दे मौके उप्पर 12 ज्हार बशेश रेलगड्डियां चलायां जाडन। राष्ट्री जनतांत्रिक गठबंधन-एन.डी.ए च बिहार दे नेताएं कन्नै चर्चा दे बाद उनें एह ऐलान कीता। श्री वैष्णव होरें आक्खेआ जे रेल मंत्रालय नै नां छडा नमीं रेलगड्डियां चलाने, सगुआं केई होरनें योजनाएं ते बुनियादी ढांचा परियोजनाएं पर बी कम्म कीता ऐ। रेल मंत्री होरें आक्खेआ जे सामान्य श्रेणी दे यात्रियें दी सुविधा लेई दिल्ली-गया,सहरसा-अमृतसर, छपरा-दिल्ली ते मुज़फ़्फ़रपुर-हैदराबाद लेई चार नमीं अमृत भारत रेलगड्डियां शुरू कीतीआं जाडन। दिल्ली च, बिहार दे एन.डी.ए नेताएं देआली ते छठ पर्व लेई रेलवे बवस्थाएं दी समीक्षा लेई रेल मंत्री अश्विनी वैष्णव हुंदे कन्नै मलाटी कीती। श्री वैष्णव होरें इब्बी दस्सेआ जे 13 थमां 26 अक्तूबर तगर जात्तरा करने आहले ते 17 नवंबर थमां पैहली दिसंबर तगर वापसी यात्रा करने आहले यात्रियें गी इक नमीं प्रायोगिक योजना दे तैहत कन्फर्म टिकट दे कन्नो-कन्नो वापसी कराये च 20 फीसद दी छूट बी मिलोग।

<><><><><><>

PM-Kolkata

प्रधानमंत्री नरेंद्र मोदी होरें आखेआ ऐ जे पच्छिम बंगाल, भाजपा दे विकास एजेंडे दी बजट कन्नै भाजपा आहली भेठा आसें-मेदें कन्नै दिक्खा रदा ऐ। इक सोशल मीडिया पोस्ट च श्री मोदी होरें आखेआ जे हर लंघदे दिन कन्नै राज्य च तृणमूल कांग्रेस दे खिलाफ जनता दा रोह बधदा जा करदा ऐ। प्रधानमंत्री होरें आखेआ जे ओह कोलकाता च इक कार्यकर्ता रैली करंगन।

<><><><><><>

PM-Bihar/ WB Visit

प्रधानमंत्री नरेन्द्र मोदी होर कल 22 अगस्त थमां बिहार ते पच्छिम बंगाल दे दौरे पर होडन। इस दरान श्री मोदी होर बिहार दे गया च 13 ज्हार करोड़ रुपें शा मते दिएं विकास परियोजनाएं दे नींह पत्थर रक्खडन ते उद्घाटन बी करडन। तोआई पच्छिम बंगाल दे दौरे दरान प्रधानमंत्री हुं'दा 5 ज्हार

200 करोड़ रुपें शा मते दिएं विकास परियोजनाएं दा नींह पत्थर रक्खडन ते केई परियोजनाएं दा उद्घाटन करने दा कार्यक्रम ऐ। श्री मोदी होर कोलकाता च नमीं बनाई गेदी सैक्शनें पर मेट्रो ट्रेन सेवाएं गी बी शुरु करोआडन। एह्दे अलावा ओहू 7 इशारिया 2 किलोमीटर लम्मे ते 6 लेनें आहले कोना एक्सप्रेस-वे दा नींह पत्थर बी रक्खडन- जेह्दे निर्माण उप्पर 12 सौ करोड़ रुपें दी लागत औगा। इस पैहलकदमी कन्नै हावड़ा ते कोलकाता दे होरनें बक्ख-बक्ख इलाकें बश्कार संपर्क सुविधा च खरा मता बादा होगा।

<><><><><><>

ISRO

देसै च पिछले 10एं बरें च अंतरिक्ष आहले खेत्तर च बेमिसाल ते दस्सने जोग प्रगत्ति होई ऐ। भारती अंतरिक्ष अनुसंधान संगठन इसरो दे अध्यक्ष वी. नारायणन होरें अज्ज नमीं दिल्ली च संवाददाता सम्मेलन च एहू गल्ल आक्खी। उनें आखेआ जे 2015 बरे थमां 2025 बश्कार पूरे कीते गेदे मिशन 2005 थमां 2015 बश्कार पूरे होए दे मिशनें थमां तकरीबन दूने ना। उनें आखेआ जे एक्सियोम-4 मिशन प्रतिष्ठित मिशन ऐ कीजे शुभांशु शुक्ला अंतरराष्ट्रीय अंतरिक्ष स्टेशन जाइयै सुरक्षित परतोने आहले पैहले भारती बने। उनें आखेआ जे अंतरिक्ष उद्योग च 300 स्टार्टअप कीते गे न जिसलै के 10 बरे पैहलें इंदी गिनतरी छड़ी 1 ही। इस मौके पर ब्हाई सेना दे ग्रुप कैप्टन ते अंतरिक्ष यात्री शुभांशु शुक्ला होरें एक्सियोम मिशन गी मुमकन बनाने लेई केंद्र सरकार ते इसरो दी टीम गी धन्नवाद कीता। उनें आखेआ जे इस मिशन थमां हासल जानकारी भारत दे औंदे गगनयान मिशन ते भारत अंतरिक्ष स्टेशन स्थापित करने लेई बड़ी कारी दी सिद्ध होगा। ग्रुप कैप्टन शुक्ला होरें स्वदेशी मानव अंतरिक्ष मिशन दे सुखने गी सच्च करने च देसै दी समर्थ पर पूरा भरोसा दस्सेआ। विज्ञान प्रौद्योगिकी मंत्री जितेंद्र सिंह ते गगनयान मिशन पर जाने आहले सदस्यें च शामिल ग्रुप कैप्टन प्रशांत बालाकृष्णन होरें बी प्रेस वार्ता गी संबोधित कीता।

<><><><><><>

Fiji PM

फीजी गणराज्य दे प्रधानमंत्री सीतीवेनी लीगामामाडा राबूका औंदे तारें थमां भारत दे 3 दिनें दे दौरें पर रौहंगन। विदेश मंत्रालय नै अपने इक बयान च आखेआ जे अपने दौरें दरान श्री राबूका संघारें प्रधानमंत्री नरेंद्र मोदी हुंदे नै बी गल्लै-कत्थै दे दौरें लांगन। प्रधानमंत्री मोदी उन्दे मानै च इक सभैरी दी मेजबानी बी करंगन।

<><><><><><>

Jaishankar-Russia FM

विदेश मंत्री डॉ. एस जयशंकर ते उन्दे रूसी समकक्ष सरगई लावरोब होरें अज्ज रूस च गल्लबात कीती। इस मौके पर डॉ. जयशंकर होरें आखेआ जे एहू बैठक राजनीतिक सरबंधें पर चर्चा करने ते दपक्खी रिश्ते दी समीक्षा करने दा मौका ऐ। उनें आखेआ जे उंदी बैठक दा मकसद हाल दे दिनें च आलमी सतह पर बना करदे हालात पर चर्चा सनै आर्थिक ते कारोबारी स्थिति दी समीक्षा करना ते आपसी साथ-सहयोग गी होर बधाने दे सांझे लक्ष्यें पर गल्लबात करना बी ऐ। उनें विश्वास जताया जे रूसी समकक्ष हुंदे कन्नै लाई गेदी एहू बैठक भारत ते रूस मझाटै सालाना शिखर सम्मेलन गी मता नतीजाकुन बनाने च पक्क गै योगदान देग।

<><><><><><>

IMD

मौसम विभाग नै गुजरात खेत्तर च तेज बरखा पौने दी चेतावनी दिती ऐ। विभाग मूजब पच्छमी हिमलयी खेत्तर, उत्तराखंड, पंजाब ते हरियाणा दे किश हिस्सें च मोहलेधार बरखा पौने दा खदश ऐं आकाशवाणी समाचार कन्नै विशेष गल्लबात च वरिष्ठ वैज्ञानिक डॉ. आर.के जेनामणि होरें दस्सेआ जे राष्ट्री राजधानी दिल्ली च दौरें शुरू होई पौगा। उनें एहू बी दस्सेआ जे पच्छिम बंगाल ते ओडिशा च बी हौली थमां मध्यम बरखा होई सकदी ऐ।

<><><><><><>

Yanam Rains

यनम कश गोदावरी दरेया च भारी बरखें करी हाडै आहली स्थिति बनी दी ऐ। सिंचाई विभाग दे अधिकारिणं दस्सेआ जे अज्ज 10 लक्ख Cusec पानी बंगाल दी खाड़ी च पाया गेआ। हाडै दा पैहला खतरा डाउलेस्वरम च जारी कीता गेआ। पानी फ्रांस टिप्पा जनेह झिगले इलाकें बल बधना शुरू होई गेदा ऐ।

<><><><><><>

Gujrat-Rains

गुजरात च बरखा थोड़ी घटी गई ऐ, पर सौराश्ट्र, जूनागढ, गीर सोमनाथ ते देवभूमि द्वारका च अजें हाडै दा खतरा बने दा ऐ। पिछले किश दिनें थमां लगातार पवा'रदिणं भारी बरखें करी जूनागढ गीर सोमनाथ ते पोरबंदर दे ग्रामीण इलाकें च पानी बडी गेदा ऐ जेदे नै आम जनजीवन बुरी चाल्ली प्रभावित होई गेदा ऐ ते जरूरी सेवाएं दी दस्तेयाबी ठप ऐ। बिजली सप्लाई कोई 200 ग्राएं च प्रभावित ऐ।

<><><><><><>

Jitender Udhampur Railway Station

केंद्री मंत्री डॉ. जतिंद्र सिंह होरें अज्ज एहू ऐलान कीता ऐ जे कम्प्यूटर राणं कायम कीती जाने आहली रेलवे दिणं टिकटें च उधमपुर दा नांऽ जेडा गलती कन्नै खुंजी गेदा हा, उसी परतियै लिखने दी बवस्था करी दिती गई ऐ। सोशल मीडिया दी इक पोस्ट च डॉ. जतिंद्र सिंह होरें एहूदे पर खुशी जाहिर करदे होई आखेआ जे रेल मंत्री अश्विनी वैशणव हुंदे आसेआ इस मामले च आपूं दखल देने दे बाद सुधार आहली एहू प्रक्रिया तोड़ चढी सकी ऐ। तोआई, इक्क होर बड्डी खबर सांझी करदे होई डॉ. सिंह होरें इब्बी आखेआ जे उधमपुर ब्हाई अड्डे थमां बडी तौलें गै नागरिक डोआरिणं दी बवस्था शुरू करी दिती जाग ते एहूदे लेई लोडचदे सब्बै बंदोबस्तें गी मुकदा रूप दित्ता जा करदा ऐ। उनें इब्बी आखेआ जे इस गैऽ कन्नै उधमपुर जिले लेई संपर्क ते विकास बाद्दे दे नमें मौके पैदा होडना। केंद्री मंत्री होरें इब्बी

आखेआ जे एह पैहलकदमी औक्कीडी प्राथमिकता गी बी दर्शादी ऐ जेड़ी प्रधानमंत्री नरेंद्र मोदी हुंदे आसेआ इस खित्ते गी दित्ती जंदी ऐ।

<><><><><><>

NHAI

भारत दे राश्ट्री राजमार्ग प्राधिकरण नै साफ कीता ऐ जे देशै दे राश्ट्री राजमार्गें ते राश्ट्री एक्सप्रेस-वे दे टोल प्लाजें पर 2 पहियें आहली गड्डियें थमां कोई बी यूजर शुल्क नेई लैता जंदा ऐ। इक बयान च शिडक परिवहन ते राजमार्ग मंत्रालय नै टोल प्लाजा पर 2 पहियें आहली गड्डियें थमां टोल कलेक्शन सरबंधी सोशल मीडिया उप्पर फैली दी फर्जी खबरें उप्पर सफाई दित्ती ऐ। एन.एच.ए.आई नै आखेआ ऐ जे राश्ट्री राजमार्गें शुल्क नियम 2008 दे मताबक किट्टा कीता जंदा ऐ ते दो पहिये आहली गड्डियें थमां टोल शुल्क लैने दा कोई प्रस्ताव नेई ऐ।

<><><><><><>

Water Sports Festival

3 दिनें दा खेलो इंडिया पानी आहली खेड्डें दा महोत्सव श्रीनगर दे ऐतिहासिक डल झील च संझा शुरू होआ जेड़ा शनिवार 23 अगस्त तगर चलोग। स्पोर्ट्स अथारिटी ऑफ इंडिया ते जेएण्डके स्पोर्ट्स काउंसल आसेआ सांझे तौरा पर आयोजित इस आयोजन दी परिकल्पना जम्मू-कश्मीर दी समृद्ध संस्कृति दे जश्न दे तौरा पर कीती गई ऐ। 36 राज्यें ते केंद्र शासित प्रदेशें थमां आए दे 500 शा मते एथलेटिक्स, रोविंग, कोचिंग ते कायार्किंग जनेह खेड्डें च हिस्सा लै करदे न। इस खेड्डे महोत्सव च वाटर स्कीइंग, ड्रैगन बोट ते शिकारा रेस जनेह कार्यक्रम बी होडन। युवा मामलें दे केंद्री राज्यमंत्री रक्षा निखिल खडसे, जम्मू-कश्मीर दे उपराज्यपाल मनोज सिन्हा ते मुखमंत्री उमर अब्दुल्ला होर श्रीनगर दे शेर-ए-कश्मीर अंतरराश्ट्री कन्वेंशन सेंटर च इस महोत्सव दे उद्घाटन समारोह च शामिल होए।

<><><><><><>